



Werner Sutter, cumember digl cunzegl administrativ; Christian Meier, architect; Mathé Camenisch, cumember digl cunzegl administrativ; Valentin Luzi, impressari; Willy Dolf, president vischnànca a president digl cunzegl administrativ, a caschùn da l'emprema badegliada da la «Tgea Muntsulej».

FOTOS G. A. CANTIENI

Ear igls unfànts da Maton en stos preschaints a caschùn da que mumaint «istoric».



Spitgieu quater ons sen que mumaint

Amprema badegliada pigl bietg polyvalent «Muntsulej» a Maton

■ (anr/grc) «Sen que mumaint vainsa spitgieu prest quater ons», à Willy Dolf, president vischnànca a president digl cunzegl administrativ da la sozietad digl project da que bietg polyvalent «Tgea Muntsulej», getg ier a caschùn da l'emprema badegliada a Maton. «La parmavera digls 2001e par l'emprema geada vagnieu raporto an la giaseta «Südostschweiz» davart que project ca veva alura ànc nign num.

«Scha nus lagn betga ristgear da vagnir degrados tier egn alp abitada sur on, stuainsa nus agir ussa», veva Willy Dolf getg da sias uras. An que bietg de vagnir integrada egn platafurma par promover la comercialisaziùn da pro-

ducts agriculs indigens, egn zenter par schar a tschains avdànzas da vacànz, tgeas vidas a tigas dad acla sco ca quegl e previeu an conex cun igl «program d'impuls turistic Muntogna da Schons», lantscho da la «regioViamala». Vetier vean a vagnir construieu egn'ustreia cun 50 plazs, cun grànda terrassa a tschentg litgs da giasts, egn'avdànza pigls ustiers, egn localitad cun frestgeras a par pacatar products agriculs sco ear egn zenter noua ca la giuvantetgna po s'antupar.

Igls custs da la construcziùn digl bietg ca basegna schi poc'energia sco me pussevel, sen egn terrassa sulegliva a l'antscheata, (agl nord) da la vischnànca Maton, amportan 1,2 miliùns fràncs. Egn parca-

di ad egn plaz da giujear par unfànts en gea avànt mán da l'oter mán da la veia.

Igl bietg polyvalent «Tgea Muntsulej» e vagnieu planiso digl biro d'architettura Christian Meier, STS, Scola tecnica superiura da Cuir. La lavur da mir fa l'interpresa da construcziùn Valentin Luzi da Ziràn. Tschellas lavurs segian ànc betga surdadas tutas. L'antscheata dezember 2004 de ver liac l'avertura da que bietg.

Esistenza par egn famiglia

Graztga a l'orientaziùn inovativa da que project à quel gudagnieu egn premi a caschùn da la concurenza naziunala «Die goldene Lerche». Surtut la politica

regiunala nova pratendi iniziativa agl liac. La «Tgea Muntsulej» porschi egn platafurma par diferaintas activitads: Egn ustreia par la vischnànca, l'intermediaziùn d'avdànzas da vacànz tras la Reka, la promoziùn da la vendita directa da products agriculs, egn localitad par radunànzas pigl vaschinadi a par uniùns sco ear egn café d'internet, «tgisà forza egn digls ple òlts, sen 1527 meters», à Willy Dolf managieu. La «Tgea Muntsulej» de davantar l'esistenza par egn famiglia a stgafir ear plazas parzialas.

La realisaziùn da que project fuss strusch stada pussevla sainza igl sustegn digl cantùn, da diferaintas instituziùns

cuminetlas, da diferaints martgieus a vaschinadis, natiralmeing ear digl vaschinadi da Maton, da donaturs privats sco ear digl architect Christian Meier a digls cumembers da quella sozietad.

Las fegnamiras prinzipalas da que bietg polyvalent «Tgea Muntsulej» den easser da radir giasts da vacànz ad indigens ple datier egn da l'oter. La purschida da litgs par giasts da vacànz an la regiùn de vagnir nizigeadà miglier, mo ear igl turissem mievel de vagnir promovieu. Igls manaschis purils den vagnir rinforzos a la vendita directa promovida, ad ign quenta ear ca la svieulta da la stizùn Volg da Maton possi vagnir augmentada.